

慢法經

西晉三藏釋法炬譯

佛語阿難有人事佛已便有富貴不衰者有

人事佛之後衰喪不利者阿難驚問佛云何俱事佛衰利不同何故得尔佛語阿難有人事佛當求明師得了了者從受戒法為除諸想與經相應精進奉行不失法教受者不犯如毛髮者是人犯道禁常為諸天善神所侍衛擁護所向諧偶財利百倍衆人所敬後當得佛何況富利耶如是人輩事佛為真佛弟子也又復有人事佛不值明師亦無經像復無禮敬不知不解強效人受法戒無有至信受戒之後故復犯衆戒心意朦冥猶豫亦不肯讀經行道作福乍信乍不信復不能念齋日燒香然燈作禮故復瞋恚喚呼罵詈出

入呪咀口初不合心懷憎嫉使人殺生見經像無有禮敬之心若其有經趣掛著壁或擲牀席之上或著故衣被弊篋器中或以妻子小兒不淨手弄之烟熏屋漏不復瞻視亦不燒香燃燈向之作禮與凡經書無異善神離之惡鬼得其便隨逐因衰疾之適得疾病恐怖猶豫自念言我初事佛云何故復疾病耶不能自信呼使巫媚之師卜問解除鎮厭無益遂便禱賽邪神衆過遂增妖魅惡鬼屯守其門遂便喪衰死亡不離門戶財產衰耗家室病疾更相注續不離床席命終牽墮泥犁中當被考治譴罰無有歲數是人但坐不能專一志意猶豫無所專據不信佛法故得其罪凶衰如是世間人不知佛法者謂呼事佛令得殃衰不知其人行自不正違犯佛經戒心意衆態具足身自招之無有與者阿難聞之便更頭腦著地為佛作禮

慢法經

言 七

阿難分別經

乞伏秦沙門聖堅譯

阿難白佛言有人事佛得富貴諧利者有衰耗不偶者云何不等耶願天中天普為說之佛告阿難有人奉佛從明師受戒專信不犯精進奉行不失所受形像鮮明朝暮禮拜恭敬然燈淨施所安不違道禁齋戒不厭中心欣欣常為諸天善神擁護所向諧偶百事增倍為天龍鬼神衆人所敬後必得佛是為善男子善女人真佛弟子也有人事佛不值善師不見經教受戒而已示有戒名憤塞不信違犯戒律乍信不信心意猶豫亦無經像既不日日燒香作禮恒懷瞋恚惡口罵詈又不六齋殺生趣手不敬佛經持著衣被弊篋之中或著妻子牀上或以掛壁無有座席供養之心與世間凡書無異若疾病者狐疑不信